



HARUN bersama kontinjen UMS dalam IENA 2012.

UMS cemerlang dalam Pameran Penyelidikan IENA 2012

UB 08-11-2012 BY

UNIVERSITI Malaysia Sabah (UMS) meneruskan kecemerlangan dalam bidang penyelidikan melalui pencapaian membanggakan pada International Trade Fair Ideas Inventions New Product (IENA) 2012 yang berlangsung di Nuremberg, Jerman pada 1-4 November lalu.

Menurut Naib Canselor UMS, Prof Datuk Dr Mohd Harun Abdullah, penyertaan kali kedua dalam pertandingan itu membuktikan hasil penyelidikan para penyelidik UMS mampu menarik mata dunia dan bertaraf antarabangsa.

Katanya, semua penyelidik UMS yang menyertai pertandingan berkenaan meraih pingat yang dipertandingkan.

“Daripada tujuh produk penyelidikan yang dipertandingkan, UMS berjaya mendapat 3 pingat emas, 3 perak dan 1 gangsa. Ini merupakan satu pencapaian luar biasa kerana kita bersaing dengan ramai penyelidik dari universiti-universiti terkemuka antarabangsa,” katanya yang turut serta menyaksikan penyampaian hadiah kemenangan di Nuremberg Exhibition Centre.

Pingat emas UMS disumbangkan oleh Prof Madya Dr Suhaimi Mohd Yasir melalui inovasi beliau yang bertajuk ‘Green house concept of solar drier for seaweed drying’. Dua lagi pingat emas

diperoleh melalui Dr Patricia Matanjun dan Prof Madya Dr Charles Vairappan melalui produk dan inovasi masing-masing yang bertajuk ‘NaTea-herbal tea mixture of Sabah green seaweed pennywort and mint’ dan ‘Degradable biopolymer from marine sponge bacteria’.

Patricia turut menyumbang satu lagi pingat perak melalui penyelidikan ‘Novel algae derived anti-inflammation drug’ manakala pingat perak selebihnya diperoleh melalui penyelidikan yang dihasilkan oleh Prof Madya Dr Chye Fook Yee.

Sementara itu, Pengarah Pusat Pengurusan Penyelidikan dan Inovasi UMS Prof Dr Felix Tongkul berkata sebahagian besar produk para penyelidik ini sedang dalam proses pengkomersilan.

“Ini secara langsung akan menyumbang kepada pendapatan universiti dan para penyelidik serta kepada masyarakat setempat. Pihak universiti akan memberi penghargaan kepada para penyelidik yang cemerlang ini dalam Anugerah Penyelidikan UMS,” katanya.

Kejayaan memberangsangkan itu turut dikongsi oleh Pendaftar UMS, Datuk Abdullah Hj Mohd Said dan Timbalan Pendaftar Kanan, Mohd Raffie Hj Janau yang turut bersama rombongan UMS pada IENA 2012.



SUHAIMI, Patricia, Charles dan Chye bersama Harun, Abdullah dan Felix.